

**VENDIM**  
**Nr. 508, datë 27.10.2022**

**PËR MIRATIMIN E TARIFAVE TË SHËRBIMIT TË SHITJES SË UJIT ME SHUMICË PËR SHOQËRINË UJËSJELLËS-KANALIZIME DURRËS SHA**

Në mbështetje të neneve 13, 14, 21 dhe 22, të ligjit nr. 8102, datë 28.3.1996, “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar (ligji nr. 8102), vendimit të Komisionit Kombëtar Rregullator nr. 539, datë 30.12.2021, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime”,

**KOMISIONI KOMBËTAR RREGULLATOR,**

Në mbledhjen e datës 27.10.2022, pasi shqyrtoi dokumentacionin e paraqitur nga Drejtoria Tekniko-Ekonomike mbi kërkesën e UK Durrës sh.a. për miratimin e tarifave të shërbimit të shitjes së ujit me shumicë, me anë të shkresës nr. 3938 prot., datë 30.6.2022, me lëndë “Kërkesë për nivel tarifar për shërbimin e shitjes së ujit me shumicë”, sipas përcaktimeve të parashikuara në ligjin nr. 8102, dhe vendimin nr. 539, të KKRR-së,

**VËREN SE:**

1. Paraqitja e kërkesës së shoqërisë UK Durrës, për vendosjen e tarifave për kategorinë e shërbimit të shitjes së ujit me shumicë, është në përputhje me përcaktimet dhe procedurën e parashikuar në vendimin nr. 539, përveç shlyerjes së detyrimit vjetor për pagesën rregullatore, i cili vazhdon të mospaguhet për shkak se llogaritë bankare janë të bllokuara nga detyrimet e OSHEE-së. KKRR-ja, me vendimin 324, datë 14.7.2022 vendosi fillimin e procedurës për shqyrtimin e aplikimit për propozimin e bërë nga UK Durrës për nivelin tarifar që i ofrohet UK Kurbin dhe UK Vorë.

2. Ujësjiellës-Kanalizime Durrës në dokumentacionin e paraqitur pranë ERRU-së me shkresë nr. 3938 prot., datë 30.6.2022 “Kërkesë për nivel tarifar për shërbimin e shitjes së ujit me shumicë”, propozon nivelet tarifore për UK Vorë dhe UK Kurbin, të cilave do t’u ofrojë këtë shërbim, sipas tabelës nr. 1.

*Tabela 1. Tarifat aktuale dhe të propozuara nga shoqëria*

| Kategoria e konsumatorëve                | Zona e shërbimit   |                      |                    |
|------------------------------------------|--------------------|----------------------|--------------------|
|                                          | Tarifat aktuale    | Tarifat e propozuara | Ndryshimi          |
| <b>A. Shërbimi shitje uji me shumicë</b> | Lek/m <sup>3</sup> | Lek/m <sup>3</sup>   | Lek/m <sup>3</sup> |
| 1. Shitje uji me shumicë UK Vorë         | 0                  | 35                   | +35                |
| 2. Shitje uji me shumicë UK Kurbin       | 0                  | 32                   | +32                |

3. Shoqëria në relacionin e saj e justifikon nevojën e ndryshimit të tarifave sipas argumenteve të mëposhtme:

a) Shoqëria UK Durrës, në zbatim të vendimit nr. 302, datë 11.5.2022, “Për politikat kombëtare për riorganizimin e sektorit të furnizimit me ujë dhe largimit, trajtimit dhe përpunimit të ujërave të ndotura” do të krijohet si shoqëri rajonale dhe do të ketë në zonën e shërbimit bashkitë: Durrës, Krujë, Kavajë, Rrogozhinë, Shijak, prandaj kërkon t’i kalojë klientët që nuk i takojnë zonës së saj të shërbimit, UK-ve që u përkasin këto zona sipas bashkive.

4. Gjatë procesit të analizës teknike-ekonomike sipas metodologjisë së llogaritjes së tarifave të përcaktuar në vendimin nr. 539, ERRU-ja ka kërkuar informacion të detajuar për secilën pikë furnizimi

të ujit me shumicë, pasi UK Durrës vlerësohet se nuk i ka llogaritur në mënyrë të saktë kostot e shërbimit.

5. Në vlerësimin e tarifave të propozuara dhe në analizën ekonomike-financiare, janë marrë në konsideratë përmbushja nga UK Durrës e kriterëve të mëposhtme:

a) kërkesave të ligjit nr. 8102, si dhe të akteve nënligjore dhe kuadrit rregullator në fuqi, në mënyrë të veçantë mbrojtjen e konsumatorëve nga çmimet monopol;

b) kërkesave të ligjit nr. 9121, datë 28.7.2003, “Për mbrojtjen e konkurrencës”, të ndryshuar (ligji nr. 9121), për moslejimin e abuzimit me pozitën dominuese në treg të ndërmarrjes nëpërmjet vendosjes, në mënyrë të drejtpërdrejtë ose të tërthortë, të çmimeve të padrejta të shitjes apo e kushteve të tjera të tregtimit;

c) kërkesave të ligjit nr. 9902, datë 17.4.2008, “Për mbrojtjen e konsumatorëve”, të ndryshuar;

d) kërkesave të VKM-së nr. 63, datë 27.1.2016, “Për riorganizimin e operatorëve që ofrojnë shërbimin e furnizimit me ujë të pijshëm, grumbullimin, largimin dhe trajtimin e ujërave të ndotura”, veçanërisht sa i takon detyrimit të shoqërisë UK Durrës për rishikim të tarifave pranë ERRU-së pas riorganizimit;

e) kërkesave të vendimit nr. 302, datë 11.5.2022, “Për politikat kombëtare për riorganizimin e sektorit të furnizimit me ujë dhe largimit, trajtimit dhe përpunimit të ujërave të ndotura”;

f) orientimin drejt mbulimit të kostove totale për shërbimin e shitjes së ujit me shumicë;

g) tarifat e propozuara nuk sjellin për pasojë efekte negative në mjedis nga veprimtaria e operatorit në zonën e shërbimit që ato do të aplikohen;

h) propozimin për miratimin e tarifave për herë të parë për shërbimin e shitjes së ujit me shumicë për UK Vorë dhe UK Kurbin, ERRU-ja e gjen të justifikuar, por jo në nivelin e propozuar nga shoqëria, referuar analizës tekniko-ekonomike.

6. Në bazë të analizës, verifikimeve dhe komunikimit me stafin drejtues të shoqërisë ERRU-ja ka vendosur detyra për t’u realizuar nga UK Durrës:

a) të pasqyrojë kostot operative të shërbimit të shitjes së ujit me shumicë në mënyrë të veçantë në sistemet kontabël;

b) UK Durrës të mbajë sistemet e informacionit për asetet me të gjitha të dhënat për to, të hartojë planin e menaxhimit të aseteve dhe të mbajë në sistemet e kontabilitetit, kostot e amortizimit të aseteve të ndara për secilin shërbim;

c) të mirëmbajë sisteme të informacionit teknik dhe financiar në përputhje me metodologjinë e vendosjes së tarifave që të mundësohet verifikimi i të dhënave;

d) të angazhohet për zhbllokimin e llogarive bankare lidhur me detyrimet e OSHEE-së, në mënyrë që të kryejë pagesën rregullatore.

Komisioni Kombëtar Rregullator, pasi vlerësoi tarifat e propozuara nga operatori mbi bazën e metodologjisë të miratuar me vendim nr. 539, datë 30.12.2022, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime”, arrin në konkluzionin se tarifat e propozuara sipas analizës së kryer janë të bazuara dhe në zbatim të kriterëve ligjore referuese lidhur me kostot e pranueshme dhe të justifikuara, si dhe përballueshmërinë, nuk janë të padrejta dhe të vendosura në kushtet e abuzimit me pozitën dominuese në treg të operatorit ekonomik në kuptim të ligjit nr. 9121, “Për mbrojtjen e konkurrencës”, të ndryshuar, dhe ligjin nr. 9902, “Për mbrojtjen e konsumatorëve”, për gjithë sa më sipër, në zbatim të neneve 13, 14 dhe 22, të ligjit nr. 8102, datë 28.3.1996, “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar,

## VENDOSI:

1. Miratimin e tarifave për shoqërinë Ujësjellës-Kanalizime Durrës, si më poshtë:

*Tabela 2. Tarifat e miratuara nga ERRU-ja për shoqërinë UK Durrës*

| Kategoria e konsumatorëve | Tarifat sipas vendimit për secilën UK |
|---------------------------|---------------------------------------|
|---------------------------|---------------------------------------|

| <b>A. Shërbimi shitje uji me shumicë</b> | <b>Lek/m<sup>3</sup></b> |
|------------------------------------------|--------------------------|
| 1. Shitje uji me shumicë UK Vorë         | 29                       |
| 2. Shitje uji me shumicë UK Kurbin       | 28                       |

2. Ky vendim hyn në fuqi më datë 1.11.2022 dhe është i vlefshëm deri në miratimin e tarifave të reja.

Ky vendim botohet në Fletoren Zyrtare.

**KRYETAR**  
**Ndriçim Shani**